

بِسْمِ اللَّهِ الرَّحْمَنِ الرَّحِيمِ

KHUTBA JUMMAH

HAZRAT MUHYI-UD-DIN AL-KHALIFATULLAH

Munir Ahmad Azim

13 Novembre 2015 ~
(30 Muharram 1437 Hijri)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hadhrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite contigne cinquième partie de so Khutba lors « *Khidmat-e-Khalq* »:

Azordi par la grâce d'Allah mo continué mo série de Khutba lors « *Khidmat-é-Khalq* », kot li ene dernier partie de mo Khutba de la semaine dernière kot mo ti pé cause lors ***Mehmaan Nawazi*** (l'hospitalité envers bane invités, envers bane pauvres, envers tous dimounes).

Concernant *Mehmaan Nawazi*, Hazrat Muhammad (saw) fine mentionne sa sujet là dans ene très joli anecdote. Ene fois ene *Sahabi* (compagnon du Saint Prophète (saw)) fine présente devant Hazrat Muhammad (saw) le matin, et alors le Saint Prophète (saw) fine dire li : « *Sa action ki to fine faire hier soir, fine faire Allah bien content avec toi (kot sa fine même fer Allah riyé)* » Et c'est à l'occasion de sa ki Allah fine révèle sa verset là :

« *Zot donne bane les autres dimounes priorités lors zot propre être. Et sa, malgré ki zot même zot en difficulté, zot dans la misère.* » (Al-Hashr 59 : 10)

En fait, c'est le même sujet ki mo ti mentionner dans bane versets Quran ki mo ti lire bane vendredi passé, ki trouve dans *Al-Insaan, Chapitre 76, Versets 9-10*. C'est ki malgré zot dans difficultés, zot donne priorité à bane les autres dimounes lors zot propre être. Kan *Sahabi* là fine tanne sa, vraiment li fine très étonner, li fine surpris ki Allah fine content avec sa action ki li fine fer là et kot Li fine révèle au Saint Prophète (saw) saki fine passé exactement.

La veille, à soir, ene *Mehmaan* ti vine kot Hazrat Muhammad (saw) et sa ti bane jours bien, bien difficiles, kot bane dimounes ti bien pauvre même kot parfois dans bane la cazes du Saint Prophète (saw) même pas ti ena narien kot li ti capave entretenir bane *Mehmaan*.

Alors li ti pé habituer faire *Elaan* (annonce) dans Masjid pou li guetter ki sanlà pou ouler amène sa bane *Mehmaan* là kot zot, dans zot la caze. Li paraitre ki vraiment ti ene l'époque difficile. Ene fois kan li fine fer sa l'appel là pou ene dimoune ki ti vine vers le Saint Prophète (saw) à cause la faim, alors ene *Sahabi* fine levé et fine dire : « *Ya Rassoulloullah donne moi Mehmaan là.* » Li fine prend *Mehmaan* là, amène li so la caze. Sa *Sahabi* là ti conne très bien ki dans la caze ena bien peu manger ki pas suffisant même pou li et so madame. Et avec difficultés bizin donne bane zenfant ene ti peu et faire zot dormi.

Donc, li ti ena sa ti hésitation là et sa ti tracas là. Dans le cœur de n'importe ki dimoune ti pou ena sa tracas là. Mais Allah fine montrer li ene plan. Et plan là, c'est sa ki li fine aller li fine dire so madame, ki ene *Mehmaan* fine vini et c'est ene *Mehmaan* du Messenger d'Allah. C'est de Hazrat Muhammad (saw) ki nous fine gagne *Mehmaan* là. Alors nous bizin guette li bien. Mais mo conner ki ena bien peu de manger, alors mo fine penser ki n'importe comment, faire bane zenfants alle dormi. Kan bane zenfant fini dormi, to faire moi conner et to dire moi ki manger fine installer. Kan mo pé amène li, nek mo pou teigne la lampe là comme-ci par erreur. De sorte ki *Mehmaan* là pas conner combien pé manger etc. Li pas bizin conne narien ki pé passer. Lerlà *Mehmaan* là pou mangé et nous nek nous pou tappe tappe nous la langue, comme-ci dirai nous pé manger.

Exactement coumsa même fine arrivé. *Mehmaan* là fine continuer manger et *Sahabi* là et so madame, ti pé faire semblant manger, zot ti pé fer bane son pou ki *Mehmaan* là pensé ki zot aussi ti pé manger. Donc pense ene coup ki kalité son zot ti pé faire are zot la bouche lors la terre et Allah ti pé bien content avec sa lors le ciel. Coumsa même ti arrivé et *Mehmaan* là pas fine conne narien. Le matin kan bane dimoune fine réuni dans Masjid pou le Namaz, Allah (swt) ti informe le Saint Prophète (saw) à travers révélation de céki fine passé. Et pou tout le temps ena ene verset Quran ki témoigne de sa anecdote là, de sa *Mehmaan Nawazi* extraordinaire là.

C'est sa même ki sa verset là pé mentionner, ki c'est pas à cause zot relation personnel ki zot guette bane *Mehmaan* là. Mais c'est pour l'amour d'Allah ki zot faire sa. Et zot pas guetter si pas dimoune ki zot recevoir là li honorable lors *duniya* ou sois non. Zot nek conner ki li ene *Mehmaan*, ene *Mehmaan* d'Allah et de So prophète Hazrat Muhammad (saw) ; li ene *Mehmaan* de l'Islam. Donc, si avec sa l'esprit là ki ou faire le *Mehmaan Nawazi*, bé ou *Mehmaan Nawazi* pou conter et pou lier coumsa sa anecdote là-même.

Dans sa anecdote là, sa *Sahabi* là ti ene *Ansar* (de Madina). Li fine montrer sa bane excellent qualités morales là. Alors sa histoire là pou continuer répéter aller même l'époque après l'époque pou démontrer sa kalité *Mehmaan Nawazi* exemplaire là. Pou ena encore bane dimoune ki pou rassembler là-dans, bane ki pou montrer même qualités morales. Même qualités excellent manières.

Donc, zot pou fer bane tel actions pour le plaisir d'Allah à travers excellent manières et à travers bon conseils. Et zot pou suivre conseils de nous bien-aimé prophete, Hazrat

Muhammad (saw) kot d'ene côté, zot ena bane bon conduite et de lotte côté, zot fer zot bane actions à travers zot bane bon conduite, et kot zot mette sa en pratique dans ene façon excellent. C'est à travers bane bon manières ki Hazrat Muhammad (saw) ti pé gagne bane le cœur. Lerlà bane conseil là ti pé faire l'effet lors le cœur pareil couma ene la terre sec accepter de l'eau. Donc ou voyage de excellent morales là pou commencer avec ou bane bon actions, ou bane bon conduites.

Donc faire ou bane bon actions arrive lors sa haute stage là. Pareil couma Hazrat Muhammad (saw) fine dire ki mo lors le pli haut stages de moralités, c'est Allah même ki fine mette moi dans ene tel stage. Donc ou aussi en suivant Hazrat Muhammad (saw) ou pou bizin prend conte ou bane manières, ou bane morales et redresse zot.

Maintenant celui ki gagne sa bane qualités morales là, est-ce ki li capave pense pou coquin droit les autres ? Zamais li capave ena ene mauvais pensé coumsa. Donc si ena sa bane mauvais manières là dans le *Ummah* de Hazrat Muhammad (saw), si relation fine gêter dans bane la cazes, bane dimounes faire bane transaction financières, prend prêter et pas rendu et ena bane déceptions, alors sa pou ene zaffaire bien grave et ki attire la colère d'Allah et pas redresse bane qualité morales. Ena prend l'argent prêter soi-disant zot dans problème ou zot pou faire ene travail, tous sa là zot faire escroquerie. Ici même dans sa ti l'île Maurice là, kot zot prend l'argent de sa bane malheureux là, soi-disant pou amène zot Canada pou alle travail et puis aller ene seul aller, pas trouve zot, zot faire escroquerie. Zot prend l'argent là zot sauvé. Tout sa là c'est bane mauvais manières.

Ene dimoune ki dire ki li appartenir à Hazrat Muhammad (saw) pas capave même concevoir pou faire sa bane mauvais zaffaires là. Li ene conception tout a fait le contraire, même de loin aussi li péna connexion. Kan mo tende bane zaffaires coumsa, kot surtout dans la religion l'Islam sa pé passer kot bane soi-disant musulmans pé faire sa bane qualités travail escroquerie là, mo le cœur commence trembler, pas trembler de colère, non. Mais de la peine, de l'impuissance. Mo penser, ki bizin faire pou ki zot écoute mo message, mo conseil ki mo pé donne zot, ki parole mo capave servi ki sa capave rentre dans zot zoreille pou ki zot ranne Sa bane victime là zot l'argent, zot droit ? Zot pas pé prend conte ki kalité punition pé attane zot kot zot Créateur, ene punition bien atroce et surtout ou fine gagne sa bane kalité enseignement là de coté d'Allah et So Prophète (saw).

Donc, *Ehsaan* li bazé lors justice. Si ou pas fine mette ou pas lors la justice bé couma ou pou capave être digne pou faire le *Ehsaan*. Donc, Allah li lève voile lors la vrai situation, et sa c'est ene message très dangereux. Kan lors sa *duniya* là même Allah (swt) commence lève bane voile là, bé après la mort tout bane voiles pou enlever nette. Et *Pardah* là pou lever d'ene tel façon le jour du *Qiyamat* ki ou humilié devant l'humanité tout entier. Donc apprene bane bon manières, au lieu ki ou faire bane triques pou coquin l'argent bane dimounes.

Alors l'Islam pas donne ou droit pou couvert bane tel dimoune ki coquin les autres dimounes. Ena ene l'autre zaffaire ki bane musulmans pé faire, la honte sa ! Saki Allah (swt) fine donne

zot, sa pas assez pou zot. Zot pé faire transaction la drogue, bane l'argent sale, pou gagne l'argent sale ki pas *Halal* (licite), augmente zot richesse temporaire, zot pé détruire combien la vie et boucou bane jeunes pé droguer et sa bane malfaiteurs là pé encaisse l'argent. Ou pou étonner pou tender combien bane musulmans pé faire transaction la drogue et combien jeunes fine quitte le bon chemin pou prend le chemin de la drogue et zot pé détruire zot complètement.

Plus étonnant encore dans le Jamaat Ahmadiyya, bane ki pé prétendre zot grand défenseurs du Khilafat, ou tanne zot zistoire, ki kalité transaction malpropre zot pé faire, zot pé enrichi zot avec l'argent sale et pé détruire combien la vie. Ou pou étonner ki ene Ahmadi même fine donne moi le pourcentage bane jeunes ki fine tombe dans la drogue : 57%, li énorme sa et sa bane mafia là zot déguiser en *Sadoo* (montrer ki zot bien pieux) et zot divant, divant dans le travail Jamaat.

Sa bane qualités dimounes là dans Jamaat, pé donne zot bel l'importance. Pas pou narien Allah fine élève So Khalifatullah et So Jamaat. Parceki le Khalifa-tul-Massih et so Amir pas bane Imams de bane *Muttaqi*, zot *imaam* de bane droguère et mafia la drogues. Donc, si ou ena un peu *haya* dans ou et si ou ena la crainte d'Allah, si ou ena *Imaan* lors Allah – pareil couma vendredi dernier couma mo ti explique zot kot Hazrat Muhammad (saw) fine faire référence, « *Si ou ena Imaan lors Allah et le Jour Dernier* » – alors ou ti bizin réfléchi ki chemin ou pé prend et kot sa pé amène bane les autres azordi jours kot zot népli pé suivre le droit chemin. Pensez bien, bane zaffaire ki ou gagner kan faire les autres souffert, bane zaffaires ki ou gagner suite à bane injustices, c'est bane cadeau maudit. Zot péna aucaine statut, aucaine importance. Donc, dans le champ de bane morales, de la moralité, nous la guerre contre sa lors deux fronts :

- ◆ Ene c'est ki nous bizin redresse nous morales façon ki Hazrat Muhammad (saw) fine comprend et fine pratique la moralité.
- ◆ Et 2^{ème} cote nous bizin faire des efforts pou sappe nous bane frères ki dans immoralités ki ena bane mauvais manières, essaye sappe zot avec l'enfer. Donne bane la cazes kot ena mauvaises manières le cadeau de bonne conduite, cadeau de bane bons morales. Dire zot ki le plaisir de la vie li trouve dans bon et excellent morales. Et ki mauvaises conduite même li ene lotte nom de l'enfer.

Donc, ki Allah donne nous l'occasion pou faire sa grand *Jihad* la et accompli tout so bane demandes. *Insha-Allah, Ameen.*